

Na osnovu člana 25., 26., 28. i 55. Statuta Općine Ilijaš ("Službene novine Kantona Sarajevo", broj: 20/09- prečišćeni tekst i 46/18) i člana 99. Poslovnika Općinskog vijeća Ilijaš ("Službene novine Kantona Sarajevo", broj:2/10, 18/15 i 7/19), Općinsko vijeće Ilijaš na svojoj redovnoj 7. sjednici održanoj 24. juna 2021.godine, donijelo je:

**ODLUKU
O RASPISIVANJU OPĆINSKOG REFERENDUMA**

Član 1.

Općinski referendum raspisuje se za cijelo područje općine Ilijaš.

Član 2.

Referendumsko pitanje o kom će se građani općine Ilijaš izjasniti glasi:

"DA LI PODRŽAVATE DA SE PONIŠTE POSTOJEĆI OPĆINSKI AKTI VEZANI ZA MJESNE ZAJEDNICE, DA SE RASPUSTE AKTUELNI SAVJETI MJESNIH ZAJEDNICA, IZRADE OPĆINSKI PROPISI I AKTI ZA USPOSTAVU DEMOKRATSKOG I ZAKONITOG PROCESA IZBORA U SAVJETIMA MJESNIH ZAJEDNICA UZ REFORMU MJESNIH ZAJEDNICA SA PRILAGOĐENIM BROJEM MJESNIH ZAJEDNICA?"

DA

NE

Član 3.

Za dan održavanja referenduma utvrđuje se 28.08.2021.godine.

Član 4.

Sprovođenjem referenduma rukovodi Komisija za sprovođenje referenduma i Odbor za sprovođenje glasanja na glasačkom mjestu.

Komisiju obrazuje Općinsko vijeće, a Odbor obrazuje komisija.

Član 5.

Sredstva za sprovođenje referenduma obezbjeđuju se u Budžetu Općine Ilijaš za 2021.godinu.

Član 6.

Ova Odluka stupa na snagu danom objavljivanja u "Službenim novinama Kantona Sarajevo".

Broj: 01/1-02-_____-__/20
Ilijaš, 24.06.2021.godine

**PREDSJEDAVAJUĆA
OPĆINSKOG VIJEĆA**

Alma Omerović, BA nov.

Obrazloženje:

I- Pravni osnov:

Pravni osnov za donošenje Odluke o raspisivanju općinskog referenduma nalazi se u članu 25., 26., 28. i 55. Statuta općine Ilijaš ("Službene novine Kantona Sarajevo", broj: 20/09–prečišćeni tekst i 46/18) i u članu 99. Poslovnika Općinskog vijeća Ilijaš ("Službene novine Kantona Sarajevo", broj:2/10, 18/15 i 7/19).

Članom 25. Statuta definisano je da: *"Općinsko vijeće može raspisati referendum radi odlučivanja građana o pitanjima iz djelokruga Općinskog vijeća, a naročito radi odlučivanja o prijedlogu o promjeni Statuta općine, o prijedlogu propisa ili drugog općeg akta koji se odnose na vitalna pitanja građana, kao i drugim pitanjima određenim zakonom i ovim Statutom."*

Članom 26. Statuta definisano je da: *Općinsko vijeće raspisuje referendum za cijelo područje Općine ili dio područja na prijedlog jedne trećine izabranih članova Općinskog vijeća, općinskog načelnika ili jedne petine mjesnih zajednica.*

Prijedlog za raspisivanje referenduma za dio područja Općine može dati najmanje 1/10 građana tog područja."

Članom 27. Statuta definisano je da: *"Općinsko vijeće je dužno raspraviti o svakom prijedlogu za raspisivanje referenduma u roku od 60 dana od dana podnošenja prijedloga. Ako Općinsko vijeće ne prihvati prijedlog za raspisivanje referenduma, dužno je obrazložiti odbijanje prijedloga i obavjestiti predlagачa."*

Članom 28. Statuta definisano je da: *"Sprovođenjem referenduma rukovodi Komisija za sprovođenje referenduma i Odbor za sprovođenje glasanja na glasačkom mjestu.*

Komisiju obrazuje Općinsko vijeće, a Odbor obrazuje komisija.

Članom 55. Statuta su definisane nadležnosti Općinskog vijeća, a članom 99. Poslovnika Općinskog vijeća Ilijaš ("Službene novine Kantona Sarajevo", broj:2/10, 18/15 i 7/19) definisani su propisi koje donosi Općinsko vijeće.

II- Razlozi za donošenje Odluke:

Programom rada Općinskog vijeća Ilijaš za 2021. godinu nije planirano donošenje ove Odluke, ali se njeno donošenje pokazalo potrebnim.

Na drugoj sjednici Općinskog vijeća Ilijaš, održanoj 04.02.2021.godine, vijećnik Almir Špiodić u ime 11 vijećnika Općinskog vijeća Ilijaš podnio je sljedeću inicijativu:

"Pokrećemo inicijativu za raspisivanje referenduma za poništavanje postojećih općinskih akata vezanih za mjesne zajednice, raspuštanje trenutnog saziva savjeta mjesnih zajednica, te izradu općinskog propisa i akata za uspostavu demokratskog i zakonitog procesa izbora u savjetima mjesnih zajednica uz reforme mjesnih zajednica sa prilagođenim brojem mjesnih zajednica." Kao rezultat navedene inicijative pripremljen je prijedlog Odluke o raspisivanju općinskog referenduma.

III- Obrazloženje pravnih rješenja sadržanih u Odluci:

Članom 1. definiše se raspisivanje referenduma za cijelo područje općine Ilijaš.

Članom 2. utvrđuje se referendumsko pitanje.

Članom 3. utvrđuje se dan održavanja referenduma.

Članom 4. utvrđuje se da sprovođenjem referenduma rukovodi Komisija za sprovođenje referenduma i Odbor za sprovođenje glasanja na glasačkom mjestu.

Članom 5. utvrđuju se da se sredstva za sprovođenje referenduma obezbjeđuju u Budžetu općine Ilijaš za 2021.godinu.

Članom 6. utvrđuje se stupanje na snagu Odluke.

IV- Finansijska sredstva za provođenje Odluke:

Finansijska sredstva za provođenje Odluke obezbijedit će se u Budžetu Općine Ilijaš za 2021.godinu.

Predlagač Odluke je Općinski načelnik shodno odredbi člana 113. Poslovnika Općinskog vijeća Ilijaš /"Službene novine Kantona Sarajevo", broj: 02/10 i 18/15/.

Obradivač Odluke je Služba za društvene djelatnosti i poslove mjesnih zajednica Općine Ilijaš.